

# Glendon Debwewin Maamiinonendamowin E-idamowaad Anishinaabemowin Inaakonigewin

Nindikidomin giishpin wenjidoo go wii-jiikendamong 150 daso-biboon gaa-dibishkamoomagak Kaanada Aki 2017 izhiseg,

1. Gichi-Ogimaakwe gaye odoogimaawiwin o-daa-nisidawinaanaawaa gaawiin gaye memwaach ji-dibaakonigeng onji, iwe inaakonigewin 35(1) gaa-izhibii'igaadeg iwe Gichi-Inaakonigewin Gaa-gii-ozhichigaadegiban 1982 gii-izhiseg Kaanada obimaadiziig ji-biminizha'amowaad, ji-dagonigaadeg gaye Anishinaabemowin Gashki'ewiziwin.
2. Gichi-Ogimaakwe gaye odoogimaawiwin o-daa-ozhitoonaawaa Anishinaabemowin Inaakonigewin. O-daa-wiiji'igonaawaa iwe Wiindamaage-mazina'igan gaa-gii-ozhichigaadegiban 2005 gii-izhiseg Odibaajimowiniwaa Gaa-gii-nanaandogikendamowaad Anishinaabemowin gaye Izhitwaawin, gaa-nakwetangin naanan gaa-wiindegin imaa TRC Wiindamaage-mazina'iganing.
3. Gichi-Ogimaakwe gaye odoogimaawiwin gii-ozhitoowaad Anishinaabemowin Inaakonigewin o-daa-ozhitoonaawaa Gichi-Anishinaabemowin-Ozhibii'igewigamig gaye ji-nisiwaad ge-ogimaakandamowaad iwe Ozhibii'igewigamig, bezhig Anishinaabe, miinawaa bezhig Eshkiime, miinawaa bezhig Wiisaakodewinini, gaye dash awiyag ge-anokiiwaad imaa Ozhibii'igewigamigong daabishkoo gaa-izhichigewaad imaa Gichi-Ozhibii'igewigamigong gaa-anokaadamowaad gaa-niizhingin waabishkiwe-izhigiizhwewinan gaa-aabajichigaadegin miziwe omaa gidakiiminaaning: Zhaaganaashiimowin gaye Baakwaa'ishiimowin, gaye dash ji-ayaad bezhig anokiimaagan endaso-Anishinaabe-dazhiikewining ji-wiidookang ji-debinigaadeg ekidoomagak iwe Anishinaabemowin Inaakonigewin.
4. Gakina ini omaa gaa-wiindegin ge-gii-izhichigepan Gichi-Ogimaakwe gaye odoogimaawiwin o-da-ganoonaawaa' ini gaa-niswewaanagizinid Anishinaabe', Eshkiime' gaye Wiisaakodewininiwa' daabishkoo gaa-ikidoomagak imaa Gichi-Inaakonigewin 1982 weweni ji-izhichigeng.

Amii dash gaye enendamaang, dago gaa-inwaadegin ji-izhichigemagakin Gichigikendaasoowigamigoon, owe giyaabi nindikidomin:

1. Gichi-gikendaasoowigamigoon o-daa-gagwe-wiidanokiimaawaa' Anishinaabe' ji-miinindwaa zhooniyaan ge-aabadizipan ji-nanaando-gikenjigaadeg Anishinaabemowin, gaye Anishinaabemowin gikino'amaagewin gaye ji-waawii'idiwaad awiyag gaa-anokiiwaad.
2. Daa-asaawag awiyag TRC ji-anokaadamowaad endaso-gichigikendaasoowigamigong.

3. Gichi-gikendaasoowigamigoon o-daa-gagwe-wiiji'aawaa' dazhiikewining gaa-ayaanid awiya' ji-gagwe-mino-bimaadizing: biinji-gichi-gikendaasoowigamigong gaye dash gich-gikendaasoowigamig ji-wiiji'aawaadi awiya' dazhiikewining, gaye iniwe izhichigewinan dazhiikewining gaa-dananokiiwaad.
4. Gaawiin wiin eta gichi-gikendaasowin Anishinaabeg gaa-gii-debinamowaad daa-gichi- inenimaasiwag, igi gaye gaa-gikendamowaad Anishinaabe izhitwaawin gemaa Anishinaabemowin daa-gichi-inenimaawag, daabishkoo naasaab ji- abiiendaagoziwaad daabishkoo igi gaa-gii-debinamowaad gichi-gikendaasowin gikino'amaadiiwigamigong.
5. Daa-gagwe-wiiji'idiwag igi gaa-anokiiwaad gichi-gikendaasoowigamigong gaye igi gaa-gikino'amaagewaad imaa ji-wiidanokiimidiwaad.
6. Gichi-gikendaasoowigamigong gaa-anokiwaad o-daa-ozhitoonaawaan Anishinaabemowin ji-gikino'amaageng ji-nitaa-anishinaabemowaad igi gaa- giizhitoowaad ogikino'amaagoowiniwaa imaa, gaye ji-nitaa-Anishinaabebii'igewaad gaye ji-debinamowaad mazina'iganan e-gii-giizhitoowaad iwe dinookaan gikino'amaagoowin.
7. Daa-gikino'amawaawag gaa-anokiiwaad imaa gichi-gikendaasoowigamigong, daabishkoo igi gaa-gikino'amaagewaad, gaye gaa-anokaadamowaad imaa gaye igi gaa-ogimaawiwaad imaa, ji-zhaabo-gikendamowaad anishinaabe-izhitwaawin.

Glossary:

Reconciliation -	Maamiinonendamowin
TRC -	Debwewin Maamiinonendamowin Gaa-gii-Anokaadamowaad
Constitution Act -	Gichi-Inaakonigewin Gaa-gii-ozhichigaadeg Kaanada obimaadiziig ji-biminizha'amowaad
Rights -	gashki'ewiziwin
Task Force on Aboriginal Languages and Cultures -	Odibaajimowiniwaa Gaa-gii- nanaandogikendamowaad Anishinaabemowin gaye Izhitwaawin